

CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE VALGA PARA O PROXECTO DE ADECUACIÓN DO ESPAZO DE ESTACIONAMENTO DA ÁREA LÚDICA DA PRAIA FLUVIAL DE VILARELLO

MEMORIA XUSTIFICATIVA

O xerente de Turismo de Galicia

DECLARA:

Que esta Axencia de Turismo de Galicia formalizou co Concello de Valga o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2024.

Que o instrumento convencional ten por obxecto establecer o marco de colaboración entre a Axencia de Turismo de Galicia e o Concello de Valga para o proxecto de adecuación do espazo de estacionamento da área lúdica da praia fluvial de Vilarello.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia de Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia de Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.



Segundo.- Que o Concello de Valga, no seu propósito da posta en valor do patrimonio cultural existente e co fin de dalo a coñecer ás persoas visitantes que recibe, como un importante sector de desenvolvemento nas zonas rurais, propón a execución de actuacións de recuperación e mantemento en correcto estado de conservación de diferentes bens de interese patrimonial no interior do núcleo, de xeito que as condicións nas que se atopen sexan acordes ó medio onde se emprazan.

O Concello de Valga é un municipio de carácter disperso, cunha superficie de 40,5 km² e unha poboación actual, a día de hoxe, de 5.748 persoas, que está situado nunha zona de paso ás grandes cidades galegas, o que fai que sexa visitado a o longo do ano por unha numerosa cantidade de persoas en busca da oferta cultural e turística existente.

Isto, xunto coa importancia que dende este concello se lle da á recuperación, conservación e posta en valor do patrimonio turístico, arqueolóxico e cultural local, fai que unha das súas prioridades sexa a de cumprir cos principios de calidade e accesibilidade en todos os destinos turísticos, que o concello pretende valorizar como fomento do turismo.

Terceiro.- Que o Concello de Valga pretende levar a cabo o proxecto de adecuación do espazo de estacionamento da área lúdica da praia fluvial de Vilarello, que considera moi importante para revalorizar e impulsar este espazo como parte dun dos grandes elementos turísticos municipais.

A Área Lúdica da Praia Fluvial de Vilarello é unha ampla zona de lecer cunha superficie de aproximadamente 2,694 Ha repartida nunha extensa zona verde, zona lúdica, zona de asadeiros e mesas, parque infantil, auditorio ao aire libre e cafetería, así como o areal que forma a praia fluvial, coa súa zona apta para o baño e un pantalán flotante para o uso de pequenas embarcacións deportivas.

A flora e a fauna deste particular hábitat constitúen ecosistemas de gran valor ecolóxico: as brañas, as veigas e o carrizal converten a desembocadura do Ulla nunca "Zona de interese natural" incluída na Rede Natura 2000 baixo o epígrafe de Lugar de Importancia Comunitaria (LIC) Sistema fluvial Ulla-Deza.

Ó mesmo tempo, a praia de Vilarello resulta igualmente interesante dende o río para aqueles que opten por facer a singradura da Ruta Xacobeira polo mar de Arousa e Ulla:



segundo a tradición, o traslado do corpo do Apóstolo Santiago dende Xerusalén remata no ascenso polo río Ulla ata Padrón.

Trátase, polo tanto, dunha zona bastante transitada polos veciños do concello, sobre todo no período estival, na que se realizan múltiples actividades deportivas, recreativas e culturais como pode ser a Festa da Xuventude, que dende fai anos se celebra o derradeiro fin de semana de xuño e atrae a innumerable cantidade de xente na procura dunhas xornadas de entretemento e diversión en familia nunha paraxe natural.

Tamén, englobada dentro do plan Valga Verde, atópase nesta zona a Aula Natureza “Brañas Vilarello”, fundamentada na estratexia de xestión turística do patrimonio natural, co fin de conseguir a sustentabilidade e a conservación dos recursos. Está concibida como unha aula interactiva onde ademais de exposicións permanentes se desenvolven unha serie de xogos-actividades relacionadas co medio natural. Está dedicada ao estuario do río Ulla, que pertence ao Sistema fluvial Ulla-Deza, un Lugar de Importancia Comunitaria (LIC) de Rede Natura 2000.

Outro servizo de que dispón este zona é unha área de autocaravanas, que está habilitada nun dos dous aparcadoiros existentes, cos servizos necesarios para tal fin.

Co fin de mellorar as prestacións e os servizos de cara ó goce dos veciños e visitantes, preténdese actuar naqueles puntos que, a día de hoxe, son deficitarios e altamente demandados, como é a continuación do lastrado na zona de estacionamento.

Ante a gran demanda de estacionamento nos momentos de maior afluencia de veciños e visitantes é necesario habilitar unha zona de estacionamento que non interfira na circulación e non represente un impacto negativo para a zona.

Atendendo a isto considérase que a mellor opción é a de dar continuidade ó lastrado na parte traseira do edificio da cafetería e, desa maneira, ampliar o espazo de estacionamento sen repercutir na visibilidade do entorno.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.



En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela

O xerente de Turismo de Galicia

Antonio Casas Calviño

